



VAŽNO JE zvati se lider

E pa, prođe i 2013. godina. Hvala Bogu! Ali ako mislite da će sa njom otići svi problemi koji su se na dnevnoj bazi množili u ovoj zemlji, onda ste optimista kojem se mi, obični smrtnici (dakako da mislim na one koji se bave nekim biznisom u ovoj zemlji na načelima rada, čestitosti, profesionalizma...) smoreni svakodnevnicom u kojoj se do 10. u mjesecu borite da platite PDV, do 20. se dovijate kako da platite dobavljačima, a do 30. da platite one koje ste čiste svijesti i u dobroj volji zaposlili u firmi koju ste optimistično otvorili prije pet, sedam ili dvije godine – moramo diviti...

I to je nekako sažetak svih problema koje imaju oni koji donose u te bezdane budžetskih korisnika, neovisno da li su vajni državni službenici ili po raznim (ne)osnovama korisnici socijalnih apanaža. Očekivati da neko okrene stvari i da - poput ostalih normalnih zemalja, uvede plaćanje PDV-a po naplaćenju fakturi, da u zakone o radu (koji se samo tako zovu, jer je riječ o zakonima za nerad, što će vam reći iole bolji advokat koji u svojoj praksi zasigurno ima barem nekoliko slučajeva iz tzv. radnog prava, u kojima se bori za sulude zahtjeve onih koji su skoro u pravilu tu istu firmu zavili u crno baš tim svojim "radom", "profesionalizmom" i "odgovornošću"; dakle, da zakone o radu uvedu u realnost, a ne namaštavanja *Superhika* i onih koji preko tih dealova misle pobrati glasove na izborima) - ravno je ukazanju nekog pametnog i odgovornog, nekoga ko bi znao biti lider u onome što radi... Dakle, ništa. Ne nadajte se tome.

I dođosmo do onoga što me kad bolje razmislim, najviše nerviralo u protekloj godini, a to su lideri. Ovdje je, naime, dovoljno okupiti šačicu nekakvih istomišljenika (barem prvih pet dana), pa se samoinicijativno proglasiti liderom i moram priznati da mi se svaki put kosa dignu u zrak (u međuvremenu je narasla) kada ih čujem....Mislim, te lidere partija, lidere radnika, lidere prosvjednika, lidere NVO-a i sve ine lidere. Prosto se ne možete okrenuti, a da pri tome ne potkačite nekog lidera iz bliže i dalje okoline. Inače, po jednoj od definicija, lideri su osobe koje imaju energiju, želju da vode, poštenje i integritet, samopouzdanje, inteligenciju, moralni kodeks i relevantno poslovno znanje. Ako bi se zaokruživali tačni odgovori za ovdašnje lidere, osobina broj dva bi bila konstanta, poneki bi imali i osobine četiri i pet, pa možda i broj jedan, ali zato osobina tri, šest i sedam skoro nema ni u tragovima. No, ništa zato – svi smo mi lideri...Prije ili poslije....

P.S. Blago nama... **B**

Aida Delić,
glavna i odgovorna urednica